

Mbanjhwngzsanh:

Cimhra Rizgaeuq Dingq Gojgeq

横山村寻幽吊古感怀旧事

□ Liz Gyanghdungh

Yawj gij gingj gyaue aenmbanj hozhaenz lai.

Mbanjhwngzsanh dieg youq Swdangz Yangh Linzgei Gih Gveilinz Si, dwg aenmbanj cienz-doengj Cungguck, dwg mbanjcoj Cinz Hungzmouz bouxhak mizmingz Ciuheingh neix, ndaw mbanj miz Cinz, Gungh, Liuz, Yangz daengj singq, ndawde singq Cinz cei lai. Ngamq haeuj ndaw mbanj, couh raen gwnz benq diegnywj geij moux gvangq ndeu miz song duz saeceij rin sang 1.5 mij baenzneix daengjndwn maenhdt, vunz ndaw mbanj naeuz, doiq saeceij rin neix nyuenz dwg baij cuengq youq baihnaj bakdou ranzhung singq Cinz, mwh bingdoi Daibingzdenhgoz hwnj baihaek gunghoenx Gveilinz gvaq Mbanjhwngzsanh, diemj feiz daw ranzhung caeuq laeuzsaw daengj ranz coemh seuqsat, caenh lw doiq saeceij rin neix roengzdaeuj.

Ndaw mbanj gij ranz gaeuq louzce ndaej haemq ndei de dwg coengceiz singq Cinz, youq Ciuheingh seiz Gvanghsi caepguh, faen ranzdou, dangqgyang caeuq dangqlaeng sam gyaeg, gak gyaeg cungj miz aen diencingj ndeu. Dangqlaeng gwnz faeciengz doiqdou miz mbaw-siengq Cinz Hungzmouz, gwnz ciengz song mbiengj miz gij gaisau Cinz Hungzmouz caeuq gij bingzgyaq Liuz Yungh daengj vunz raiz haenx. Ndaw coengceiz cei dijbaui haenx dwg gep sigbei gaek sei Genzlungz vuengzdae raiz soengq Cinz Hungzmouz haenx, sigbei sang 1.5 mij gvangq 0.6 mij baenzneix, cihsaw lij yienhsag nyinh ok. Seizhaenx Cinz Hungzmouz 61 bi diuh bae dang Gyanghsuh sinzfuj, Genzlungz vuengzdae soengq soujsei hawj de, doiq de maqmuengh gig naek. Cinz Hungzmouz dwg vunz Hwngzsanh, Ciuheingh Yunghcwngh nienzgan cinsw, dang bucwnghij, sinzfuj, cungjduz, binghbu sangsuh, dungh-gwz dayozsw giem gunghbu sangsuh gvaq, dwg Ciuheingh seiz Gangh Genz bouxhak seuqcingh ndeu, youh dwg bouxhak lijyoz mizmingz ndeu, ndawbiengz mingzdaeuz ndeiraeuh; seiqvunz de raiz saw 150 lai cungj gyawj 300 fanh lai cih saw, ndawde 《Haj Cungj Gvice》yingjyangj gig

hung, dwg sawson Ciuheingh sevei son'gyauq caeuq lwgnyez son'gyauq. Baihnaj mbiengjswix coengceiz miz aen lijdangz ndaej naengh 500 lai vunz ndeu, dwg mbanj ranz gaeuq "Yungzmwnz Cunghyoz" vih geiq-niemh Cinz Hungzmouz, youq bi 1943 Lij Cunghyinz, Bwz Cungzhij, Vangz Sicuh, Lij Cisinah daengj vunz fathwnj, youq henz mbanj cauxbanh hwnjdaeuj. Mbanjhwngzsanh daihdaih ok vunzcaiz, gyog singq Cinz couh gonqlaeng miz gohgyaz canghyienz boux ndeu, cinsw 4 boux, gaijyenz 2 boux, gijyinz 26 boux, gungswng 9 boux. Baihlaeng lijdangz miz geij go faexcung geq gaenq maj baenz bak bi, ngafaex iet raezrangh mbawfaex mwncupcup, cangqcoek sangvid, baenz Mbanjhwngzsanh aen gingj daegsaek gag miz ndeu, ndawde miz go ndeu naeuz

dwg Cinz Hungzmouz doekseng seiz vunz ndaw ranz vih de ndaem, daengz seizneix gaenq 300 lai bi, yiengh gofaex lumj aen liengj hung nei cei cangqnoengq, ganjfaex aeu haj boux vunz fwngz daep fwngz cij got ndaej gvaq.

Ndaw Mbanjhwngzsanh lij louzce miz mbanj ranz gaeuqgeq, sanq baij youq song henz roen benjin, byaij haeuj gij honghai vang'vet camca neix, douringung, ciengzrin seiz mbouj seiz yap haeuj da daeuj, rizgeq yapyag. Byaij daengz aenmbanj baihaenx, lij raen miz aen miuh gaeuqgeq ndeu, laeuzdourin sam mij lai sang daengjdwit yiemzruk, gwnzde sij miz "Miuhgeq Lungzvaz" seiq cih saw hungloet rengzrwd, lij yienhsagsag yawjraen, baenz gizdieg hekyouz haengj bae yawjngonz ndeu.



▲ Lizdangz gaeuq lij louzce ndaej ndei.



▲ Lizdangz gaeuq, ranz gaeuq ndoj youq laj raemh faexcunggeq.



▲ Aen "Miuhgeq Lungzvaz" laeng mbanj coihcingj moqsag.



▲ Daj gwnz sang yawj gingj daengx mbanj.



▲ Siengqdoengz Cinz Hungzmouz.



▲ Aencingj gaeuqgeq raemx rimmwd sawyau.



▲ Luengqhongh iq iet daengz laj dinbya laeng mbanj.